



Kerja mendalamkan Sungai Plentong yang dilaksanakan pada Julai 2011 hingga Januari 2013 menerusi **Rancangan Tebatan Banjir (RTB)** Jabatan Pengairan dan Saliran Johor.



Pekerja pembinaan sedang mendirikan tembok menghalang hakisan tebing berdekatan jambatan Ros Merah Utam Jaya.

Isu banjir kilat di Plentong, Johor Jaya diatasi

» **JPS laksana RTB di Sungai Plentong dengan kos RM7.3 juta**

Oleh Mahani Ishak
bhjb@mediaprima.com.my

► Johor Bahru

Masalah banjir kilat sekitar Plentong dan Johor Jaya berjaya diatasi apabila Jabatan Pengairan dan Saliran (JPS) melaksanakan Rancangan Tebatan Banjir (RTB) di Sungai Plentong dengan kos kira-kira RM7.3 juta.

Projek dibiayai Kementerian Sumber Asli dan Alam Sekitar meliputi kerja mendalamkan sungai, mengukuhkan tebing serta mengalihkan utiliti bagi meningkatkan keupayaan sungai menampung air.

Jurutera JPS Daerah Johor Bahru, Khairunisah Husain, berkata projek itu dilaksanakan sejauh dua kilometer dimulakan pada Julai 2011 sebelum berjaya disiapkan awal tahun ini.

“Langkah itu juga termasuk pencegahan hakisan bagi mengelak tebing daripada runtuh dan pemantauan data hujan dan paras air sungai secara atas talian di stesen sistem telemetri

dekat Sungai Plentong.

“Menerusi sistem ini, data hujan dan paras air sungai dapat diketahui dengan mudah dan langkah awal kemungkinan banjir dapat diambil melalui data diperoleh atas talian,” katanya.

“Menerusi sistem ini, data hujan dan paras air sungai dapat diketahui dengan mudah”

Khairunisah Husain,
Jurutera JPS Daerah
Johor Bahru

Khairunisah berkata, projek itu adalah kesinambungan RTB terdahulu yang dijalankan antara Februari 2009 hingga Ogos 2010 bernilai RM37.3 juta hasil peruntukan kementerian sama.

“Kita juga memasang sangkar batu yang lebih dikenali Gabion, selain membina ‘sand filled mattress’ bagi mengelak hakisan tebing pada masa akan datang.

“Menerusi peruntukan terbabat status banjir kini semakin

terkawal dan pada masa sama penduduk diharap bersikap lebih bertanggungjawab terutama tidak membuang sisa domestik ke dalam sungai,” katanya.

Jarang dinaiki air banjir

Sementara itu, penduduk Kampung Sri Saujana, Jaafar Mohamad, 54, mengakui kediaman mereka kini jarang dinaiki air berbanding dua tahun kebelakangan sejak projek mendalamkan Sungai Plentong dan Tebrau dilaksanakan secara menyeluruh.

“Paling tidak, hanya jalan dinaiki air dan saya berharap kerajaan negeri menimbangkan cadangan membina tembok konkrit bagi mengelak limpahan air.

“Sebelum ini, saya terpaksa membina tembok di hadapan rumah bagi mengelak air melimpah masuk kerana sudah berpuh kali berdepan banjir kilat,” katanya.

Peniaga di Medan Selera Jalan Bakawali 11, Zakaria Talib, 46, berkata sejak sistem perparitan itu dinaik taraf, peniaga tidak lagi berdepan masalah banjir yang sebelum ini terjadi setiap kali hujan lebat.

Katanya, dahulu penduduk sentiasa bersedia berikutan jalan utamanya akan dinaiki air hingga menyebabkan kenderaan tidak boleh melaluinya disebabkan limpahan air daripada sistem perparitan.